

Lajčák: FBiH se mora uhvatiti u koštac sa izazovima



Visoki predstavnik i specijalni predstavnik EU, Miroslav Lajčák, kasno jučer sastao se u Sarajevu sa premijerom Federacije BiH Nedžadom Brankovićem.

Pozdravili su plan Vlade FBiH da revidira listu ratnih vojnih invalida, kako bi pomoć dobili oni kojima je najpotrebnija.

U vezi sa oktobarskim izborima na opštinskom nivou, visoki predstavnik i specijalni predstavnik EU je izrazio zabrinutost da FBiH nema zakonsku regulativu kojom bi pokrila sukob interesa izabranih zvaničnika. "Rješenje ovog pitanja je od osobite hitnosti, jer se izbori približavaju", upozorio je Lajčák. Preporučio je da FBiH privremeno uvede primjenu državnog zakona na nivou Federacije.

Visoki predstavnik i specijalni predstavnik EU pozvao je premijera Brankovića da se posveti pitanju privatizacije energetske i telekomunikacijske sektora u FBiH, jer još ne postoji suglasnost među strankama u Federaciji kako riješiti ovo pitanje.

Visoki predstavnik i specijalni predstavnik EU je pozvao FBiH i RS da nastave razgovore o problematici koja se odnosi na rad preduzeća za prenos električne energije. Vijeće za implementaciju mira se izjasnilo da se ni jedan entitet ne može jednostrano povući iz ranije dogovorene reforme, te je pozvalo da se konsolidacija institucija na državnom nivou nastavi.

Sagledavajući načinjene pomake u pogledu ciljeva i uslova koje

je postavilo Vijeće za implementaciju mira u februaru, visoki predstavnik i specijalni predstavnik EU je pozdravio brzo donošenje Strategije za reformu sektora pravosuđa na nivou FBiH. On je naglasio da se Komisija za državnu imovinu BiH, u oktobru prošle godine, dogovorila o funkcionalno-teritorijalnom principu raspodjele, prema kojem bi entitetima pripala imovina koja nije potrebna državi.

“Ustav BiH ne navodi koji nivo vlasti kontrolira koju imovinu”, rekao je on. “Očekujem da politički lideri načine pomake po ovom pitanju na sastanku 23. augusta”.